



**Broj predmeta:** KSI-12-337/22

**Datum:** 12.10.2022. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta BiH“ broj:04/21) i člana 25. stav (2) Poslovnika o radu Komisije za odlučivanje o sukobu interesa („Službeni glasnik Brčko distrikta BiH“, broj 19/21), Komisija za odlučivanje o sukobu interesa, postupajući po anonimnoj prijavi od 23.09.2022. godine protiv M. B., člana Upravnog odbora Zavoda za zapošljavanje Brčko distrikta BiH, kao nosioca javne funkcije, na 33. sjednici održanoj 12.10.2022. godine, donosi

## **ODLUKU**

Postupak za odlučivanje o sukobu interesa protiv nosioca javne funkcije, M. B., člana Upravnog odbora Zavoda za zapošljavanje Brčko distrikta BiH, povodom navoda da je ista učestvovala u donošenju odluka koje se tiču Zavoda za zapošljavanje na sjednicama Vlade Brčko distrikt BiH i uticaja na donošenje odluka o zapošljavanju, neće se pokrenuti, s obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do osnovane povrede odredaba Zakona, odnosno postojanje sukoba interesa.

## **Obrazloženje**

Dana 23.09.2022. godine, Komisija za odlučivanje o sukobu interesa zaprimila je anonimnu prijavu, broj: KSI-12-337/22, radi sumnje na povredu odredaba Zakona, odnosno postojanje sukoba interesa protiv nosioca javne funkcije M. B., člana Upravnog odbora Zavoda za zapošljavanje Brčko distrikta BiH.

U prijavi se navodi da je M. B., član Upravnog odbora Zavoda za zapošljavanje Brčko distrikta BiH, nakon imenovanja na poziciju „Sekretar Vlade“ Brčko distrikta BiH učestvovala u donošenju odluka koje se odnose na Zavod za zapošljavanje Brčko distrikta BiH, čime postoji mogućnost štete za Budžet Brčko distrikta BiH. Nadalje se navodi, da je pogodovala pri zapošljavanju određenih lica u Apelacionoj komisiji Brčko distrikta BiH, Sektoru za koordinaciju politika i opšte pravne poslove i Odjeljenju za evropske integracije i međunarodnu saradnju, te da je licima angažovanim po ugovoru o obavljanju posebnih poslova zaposlenih u Sekretarijatu Vlade Brčko distrikta BiH, odobravalala godišnji odmor iako to nije regulisano navedenim ugovorom. Takođe, zahtijeva od Komisije za odlučivanje o sukobu interesa da utvrdi sve relevantne činjenice, te ukoliko se utvrdi postojanje povrede odredaba Zakona o sprečavanju sukoba interesa, primijeni odgovarajuće mjere.

Članom 2. tačka c) Zakona o sprečavanju sukoba interesa u institucijama Brčko distrikta BiH propisano je da je nosilac javne funkcije izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koji vodi Komisija, utvrđeno je da M. B. obavlja funkciju člana Upravnog odbora Zavoda za zapošljavanje Brčko distrikta BiH, na osnovu Odluke o imenovanju članova Upravnog odbora Zavoda za zapošljavanje Brčko distrikta BiH, broj: 33-001878/18 od 15.08.2018. godine, te je obavezna postupati u skladu s odredbama Zakona o sprečavanju sukoba interesa u institucijama Brčko distrikta BiH.

Članom 5. stav (1) Zakona o sprečavanju sukoba interesa u institucijama Brčko distrikta BiH propisano je da nosilac javne funkcije obavlja samo jednu javnu funkciju, a stavom (5) navedenog člana da je obavljanje javne funkcije nespojivo sa članstvom u organima upravljanja, nadzora i rukovođenja u pravnim licima koja su osnovana od strane organa i institucijama na bilo kojem nivou vlasti u BiH.

Članom 24. stav (3) Zakona o državnoj službi u organima javne uprave Brčko distrikta BiH propisano je koja su radna mjesta u organima javne uprave, odnosno tačkom a) istog člana da je jedna od vrsta radnih mjesta i radno mjesto vezano za mandat gradonačelnika, a što je radno mjesto sekretara Vlade Brčko distrikta BiH, koje se popunjava putem javnog konkursa, shodno članu 2. tačka n) navedenog Zakona. Pozicija sekretara Vlade Brčko distrikta BiH ne predstavlja javnu funkciju shodno Zakonu o sprečavanju sukoba interesa u institucijama Brčko distrikta BiH.

Članom 3. Poslovnika o radu Vlade Brčko distrikta BiH propisan je sastav Vlade, koju čine gradonačelnik, zamjenik gradonačelnika, glavni koordinator Vlade i šefovi Odjeljenja Vlade. Članom 11. stav (4) Poslovnika propisano je da na sjednici Vlade, pored članova Vlade na sjednicama Vlade prisustvuje i sekretar Vlade, bez mogućnosti glasanja, kako je navedeno u članu 24. Poslovnika i da je glasanje isključivo u nadležnosti članova Vlade.

Nadalje, članom 12. stav (1) Poslovnika propisano je da su ovlašteni predlagači tačaka dnevnog reda sjednice Vlade isključivo članovi Vlade, rukovodioci organa javne uprave i šef Policije Brčko distrikta BiH, te da je sekretar Vlade Brčko distrikta BiH shodno članu 14. stav (1) Poslovnika odgovoran za pripremu i tehničku podršku za održavanje sjednica Vlade.

Članom 26. Statuta Zavoda za zapošljavanje Brčko distrikta BiH, propisano je da je Upravni odbor za svoj rad odgovora i podnosi godišnji izvještaj o radu Skupštini Brčko distrikta BiH iz čega proizilazi da Upravni odbor Zavoda za zapošljavanje nema uske povezanosti sa Vladom Brčko distrikta BiH, nego su usmjereni u svom radu na Skupštinu Brčko distrikta BiH.

Članom 3. Instrukcije o načinu imenovanja Komisije za zapošljavanje u organima javne uprave Brčko distrikta BiH, broj: 02-000176/15 od 15.05.2015. godine, propisano je da prijedlog članova Komisije za zapošljavanje u organima javne uprave Brčko distrikta BiH dostavlja rukovodilac organa javne uprave Odjeljenju za stručne i administrativne poslove-Pododjeljenju za ljudske resurse i to dva člana od kojih je jedan neposredni rukovodilac upražnjenog radnog mjesta, dok jednog člana Odbora za zapošljavanje, po principu rotacije određuje Odbor za zapošljavanje. Sekretar Vlade Brčko distrikta BiH ne može imenovati bilo koje lice, tako ni lica navedena u prijavi, zaposlena u Apelacionoj Komisiji Brčko distrikta BiH, Sektoru za koordinaciju politika i opšte pravne poslove i Odjeljenju za evropske integracije i međunarodnu saradnju Brčko distrikta BiH, te je nadalje odredbama Zakona o državnoj službi u organima javne uprave Brčko distrikta BiH propisan postupak odabira najuspješnijeg i izabranog kandidata, po kojem gradonačelnik pismeno potvrđuje odabir kandidata sa dostavljene rang liste. Takođe, članom 47. istog Zakona propisano je da premještaj službenika između organa javne uprave vrši gradonačelnik rješenjem, na osnovu pisanog sporazuma tih organa javne uprave. Shodno navedenom, sekretar Vlade Brčko distrikta BiH ne odlučuje o zapošljavanju i premještaju državnih službenika.

Pravilnik o radu službenika i namještenika u organima javne uprave Brčko distrikta BiH propisuje mogućnost angažovanja lica radi obavljanja posebnih poslova za onu vrstu poslova za koja nisu predviđena radna mjesta, kao i to da je rukovodilac organa javne uprave dužan uspostaviti sistem praćenja i kontrole obavljanja posebnih poslova. Ugovorom o obavljanju posebnih poslova u organima javne uprave, propisano je da neposredno pretpostavljeni rukovodilac, licu angažovanom na osnovu Ugovora, može odobriti korištenje slobodnih dana, u slučaju naročite potrebe.

Na osnovu zahtjeva Komisije, Kabinet gradonačelnika Brčko distrikta BiH, dopisom broj: 48-000634/22 od 04.10.2022. godine dostavio je podatke iz kojih je vidljivo da je M. B. trajno raspoređena na radno mjesto „Viši stručni saradnik za harmonizaciju propisa u Odjeljenju za evropske integracije i međunarodnu saradnju“, te je rješenjem šefa Odjeljenja za evropske integracije i međunarodnu saradnju, broj: 33-000953/21 od 02.03.2021. godine istoj odobreno korištenje neplaćenog odsustva, radi obavljanja poslova sekretara Vlade Brčko distrikta BiH, na određeni period.

Na osnovu prikupljenih podataka i dokumentacije i uvidom u iste, utvrđeno je da u postupcima M. B., člana Upravnog odbora Zavoda za zapošljavanje Brčko distrikta BiH, kao nosioca javne funkcije, nije došlo do povrede odredaba Zakona o sprečavanju sukoba interesa Brčko distrikta BiH, odnosno da ne postoji sukob interesa, te da nisu utvrđene okolnosti koje bi ukazivale na moguću povredu odredaba Zakona od strane nosioca javne funkcije.

Slijedom navedenoga, Komisija je donijela odluku kao u dispozitivu.

#### **POUKA O PRAVNOM LIJEKU:**

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta BiH u roku od 30 dana od dana prijema Odluke.

Predsjednik  
Komisije za odlučivanje o sukobu interesa

---

Admira Mujić, dipl. pravnik

#### **Dostaviti:**

1. Anonimnom podnosiocu-putem oglasne ploče,
2. Internet stranici Komisije,
3. Evidenciji i
4. Arhivi.